

本朝分省人物考

人物考目錄卷之九十九

山西太原府一

王克巳

董俊

戈謙

姜濤

周瑄

王鑑

王鈇

王夢弼

張淑勵

王永壽

趙文博

林春

張順

雷澤

周經

梁璟

張縉

陳璧

喬宇

王瓊

劉繹

唐希介

楊傑

劉淮

陳璘

王源

崔侃

張天相

寇儉

白侃

胡孝思

吳嘉會

孫璽

張鏡

張文明

党承志

侯倫

陳臯謨

王玫

喬毅

寇天叙

孫紹先

張珩

謝蘭

唐寬

潘高

周鈇

本朝京省人物考卷之九十九

南直督學御史西浙過庭訓纂律

門人蘇松備兵副使南郡熊膏叅閱

男 過銘盤

過銘孟

過銘篋

寧國府學生員嚴弘志

句容縣學生員劉孔揚全訂正

山西太原府

王克巳

王克巳山西太原府壽陽縣人博通經史洪武初以文學辟除戶部主事在部潔已不淄慎出納善於其職七年陞試吏部尚書本年以疾乞致仕

董俊

董俊山西太原府太原縣人洪武初舉人才擢萊州府知府爲政廉平寬猛得宜民樹碑頌其美九年陞兵部侍郎十二年以政績陞兵部尚書十三年三月上革中書省陞六部正二品戒之曰識山川之險易嚴烽堠之分明尋令挨無籍貫軍經十次回申者卽爲開豁未幾免官予致仕

戈謙

戈謙山西太原府代州人永樂辛卯進士擢戶科給事中骭儼勁直不折節下人遇國家大事知無不言雖逆天威不輒避十八年陞行在大理寺右少卿二十二年仁宗嗣位謙數言事洪熙元年又因事直言上厭其繁瑣尚書呂震等交奏其賣直沽名遂召大學士楊士奇等榻前語以謙之踰分士奇對曰謙不知大體有之然其心感陛下超擢之恩欲圖報効古人有言主聖則臣直惟陛下容之不然進言者將懼矣上雖不罪謙然臨朝之際數形

於辭氣又數日 上御奉天門楊士奇獨奏事因進
曰 陛下頒詔求言言不當者不罪戈謙不曉事激
聖怒數日朝臣皆悚駭相與以言爲戒今遠近朝覲
之臣皆集闕下目見而口傳將謙之名愈彰而朝廷
受不容直言之謗 上惕然曰此固是朕不能容亦
呂震迎合以益吾過也自今吾不復言謙遂免謙朝
叅令專坐司視事自是一月餘朝臣言事者少 上
特召楊士奇諭曰爾料事不虛自免戈謙朝言者不
至豈果無事可言對曰臣下孰不欲進言納忠惟在
上寬容以來之 上曰朕非怒謙言事但其言矯激

過實爾可語衆人以朕之實心對曰此非臣言所能使之信必得璽書親諭乃見 聖德之實遂令士奇就榻前書勅引過命戈謙如舊朝叅令百官言事無以謙爲戒未幾有言中官謝安四川伐木虐民者于是召戈謙諭曰爾本清鯁之臣朕今以清鯁用爾遂陞謙副都御史賜鈔緡馳驛詣四川罷伐木之役并糾察官吏等宣德元年回院以忤 旨罷爲民正統十四年土木之變 英廟北狩 郕王嗣位布衣走闕下疏前成山侯王通龍門致仕指揮甯河真定同知阮遷十三人皆奇才可用適報虜酋也先犯紫荆

口時石亨爲時倚重借于尚書謙治兵土城外衆議
欲以通副亨召謙等至左順門通辭不預兵政久矣
一旦以副人不能也謙則力言專用通衆導之再四
兩人持論牢不動事遂已六科聞謙負重名奏留之
亦不報不久竟卒

姜 濤

姜濤字靜之太原府忻州人永樂甲午鄉舉授嘉興
府同知二十一年改河間府宣德九年以剛正廉幹
陞本府知府有政績敏決有爲士民宜之正統元年
陞順天府尹安常率職民亦不擾四年京大水命存

問被水軍民具奏賑濟十一年陞戶部右侍郎十二年陞戶部左侍郎十四年卒於官

周瑄

周瑄字德孚山西太原府陽曲人應天府江寧籍宣德乙卯登鄉試會試中乙榜不就束書入太學以友天下士學益進正統甲子用吏部銓授刑部江西司主事精究法意獄明審尚書金濂於羣屬中獨愛重之凡大獄必以委之有死罪囚累訴其枉乃微服訪之累月一日至城南聞村姥言其事果寃囚得釋給事中翟讓御史劉訓給燕山左衛鈔誣官盜取下

法司瑄辦其誣丁卯奉命錄南北畿重囚所至多平反者已巳北征部屬當扈從者率多託疾乃毅然請行被重創而還景泰初陞署河南司郎中事有校尉受贓縱真盜而以宿讐寘其間欲陷之死瑄力辨之校尉反坐嘗視獄有囚八百人時天暑懼有病死者三日盡發遣衆以爲片言折獄之才時刑部闕右侍郎吏部推代之益盡心以洗冤澤物爲已任辛未陪幸大學有絲幣之賚甲戌順天河間二府民饑勅往賑之二府素無蓄積又連遭大水乃條奏八事一裁省各處冗官二停徵當歲糧草三添減軍士糧草

舊四免追久負馬匹五暫罷供應柴炭夫役六皇莊
湖泊之利恣民採取七招商中納鹽糧損其斗數八
借水次官倉之粟濟民事下戶部不能皆從而招商
借粟之說尤以爲難 上聞詔特從瑄議瑄又爲之
具耕牛種粒以便於民時亢旱苗稿行部至武清禱
雨立澍時致仕尚書馮昂謂曰昔有御史雨今爲侍
郎雨矣秋大熟天順戊寅陞左侍郎癸未命掌工部
事又命掌都察院事成化改元命祭告中鎮霍山及
晉代瀋三府未還陞右都御史總督南京糧至則嚴
祛宿弊有侵盜爲奸者悉抵于法謫戍遠邊倉場爲

之肅然嘗上南京城守事宜八條戊戌南畿糴貴詔發京庾之粟賤鬻之以平其價民食不艱畿輔乃安是歲陞南京刑部尚書告戒諸司事非會勘者不得出五日以是囚無冤滯適獄中疫罪輕者悉遣之歡聲載道以考滿乞休者再三准致仕先世業墜無田產又久住金陵樂其風上遂仍歸江南寄籍江寧口與故人親戚飲眺樂至甲辰五月六日卒年七十六瑄德性寬宏氣度詳雅修髯長身議論英發平生不枉道千人在國子時同堂生喪妻無所得樁瑄因家人送貲費至傾橐與之爲主事時有罪人貧不能輸

官紙聞欲鬻幼子卽以折糧絹償其直還其子事親
最孝遇時節雖老猶悲泣出入兩京法司幾四十年
活民利國之功尤多故位登八座壽幾八泰子孫二
十餘人策名甲科聯官清要如文端公經尤爲名臣

王鑑

王鑑字參昭太原縣人正統中進士除江西道御史
天順元年劾石亨廷杖謫虜施令暮年吏畏民懷邑
以大治陞延安府知府疏請致仕

王鈇

王鈇字汝威榆次縣人進士初授行人選除湖廣道

御史巡按陝西山東所歷咸以剛正著聲改右春坊
兼翰林院侍書以建言謫廬州府知事陞國子監丞
擢吏部主政疏劾權相調河南府通判尋陞南京吏
部終爲當道不容斥罷爲民卒後贈光祿少卿

王夢弼

王夢弼太原府人以進士知掖縣入拜諫垣時楚世
子弒逆上命卽寘諸法夢弼持舊典三奏不以震
怒爲恐歷七載章疏數十上侃侃多名言陞太常少
卿夢弼故晉產習知邊事是言議諸愾慨自負廷臣
薦以邊材超拜都御史巡撫寧夏時戎務廢弛

嬉玩疏脩邊墻保疆圉備兵馬責實効數事上于朝
又以戒請託禁科歛謹烽堠嚴戍守時糧餉下爲令
期年軍民悅服已而黠虜入寇諜知其虛巢整兵襲
之斬獲功多晉秩賜金綺復念寧夏三百臨虜乃于
西赤木諸口相度險要脩築墩堡一百七十餘里居
六載乃有總督三邊之命威名夙著邊塞而又歷任
旣久凡將帥之貪廉士馬之精罷夷情之向背與夫
關塞之險易堅瑕無不洞析毫髮虜或入寇斬獲追
逐後亦無敢窺伺者以致仕歸卒廕子者再

張淑勵

張淑勵孟縣人第進士知歷城縣歷多山磽瘠水則
陂圩值凶歲民無所自活而又多供億送迎之苦淑
勵至屬歲災厲邊被兵師旅在外急催科如捕亡青
持戟之士肩摩就募道路使者相望疲命于將迎循
循應之事以次就緒邑田瘠稅腴民逃徙則第坵畝
履原隰視土嫩惡以登下其賦百姓始不以磽瘠爲
子孫憂徃供億轉置舊委諸編戶歲終得代其產蕩
然淑勵始定吏會之議使度支在官工賈無以乘緩
急器業儲粟得轉相爲用百年敝政如洗民不重困
日晉接不遑暇而儀愈安未嘗餽厨傳稱過使客疲

民以取譽每折獄率取決片言而臺臺問民疾苦必
竟辭月旦與諸弟子設俎豆言詩書再登薦者七人
所在生齒繁殖流移嚮附者衍負版焉輕徭薄賦與
民休息民亦愛之如父母畏之如嚴師後以徵召入
京思而慕之不啻赤子之乍離襁褓也以疾卒于京

王永壽

王永壽字延齡太原縣人修躬多髯以淳謹寡默稱
正統丁巳以舉人任江西饒州府推官三載選廣西
道監察御史嘗從征北虜凱還受賚巡按山東貴州
及蘇松等處後任工部右侍郎調南京工部歷三載

陞本部尚書未幾調北工部奉勅巡撫湖廣以安靜
得人心尋命兼督軍務征銅鼓五開等處苗賊成功
賜從一品俸天順初復調南京工部天順六年九月
卒於官遣官祭葬

趙文博

趙文博字子約代州人景泰甲戌進士除監察御史
謫陝西淳化令遷守衛輝調鞏昌陟陝西布政司右
叅政山東右布政左布政都察院右副都御史文博
爲御史按河南南畿有聲景泰丙子偕同列糾劾忠
國公石亨 英廟親訊於別殿下鏤衣獄值雷雨之

變始得釋謫官去後亨事敗詔吏部簡拔方守衛輝
時境內久旱禱於神雨大澍新孔子廟及諸生齋舍
民莫知費所出地瀕河舊有舟六特供藩臬意所遣
疏罷之藩臬有欲中以禍者又疏聞朝廷遣官覈之
改知臨洮臨洮雜戎號難治治之如衛輝以薦改鞏
昌通稅積多征輸有法期月而大治爲叅政西戎爲
寇奉檄督軍竟以捷報爲都御史巡撫河南歲凶民
艱食賑貸有方民不苦饑陝西流民率聞風來歸瘁
躬竭思以居以哺民忘其流千戶席英與其黨爲盜
京城懼事覺乃裹甲以行都人莫敢櫻所過肆掠武

臣以詔提兵數千躡其後南走千餘里亦莫敢迫至
河以計擒之械送京師伏誅有文綺之賜成化丁未
罷歸遂不復起家居十一年弘治丁巳卒年七十有
三

林春

林春字孟陽代州人爲文有理致尤工古文辭且精
於書翰景泰庚午領鄉試會試中乙榜當得校官不
就入太學參政葉公盛舉同纂修都司地誌搜考訂
定善於序述持身端慎遨遊公卿間惟以禮接一言
不及外事有建繫者賫重賄要其解釋力謝絕之居

貧而能有守若此復入太學從學士呂文懿卒業言
溫氣和薰然君子也鄉人素愛之延請者無虛日意
度灑如也後待次吏部授應天府馬政判以清節自
勵攻駒考牧恪盡乃心而民受其惠無敢干以私者
行縣較閤止食公廩一毫不取於民蒔蔬公廨隙地
至則摘以自給其廉如此或有笑其迂者曰我儒者
誠迂若楊伯起則古之迂者也我願學焉再考最政
聲日起性酷好書每暇輒磨墨伸紙揮汗呵凍不輟
字體清勁道麗得者皆珍襲之以屬理場屋事勞遂
成痼不能食數日竟卒爲人外雖和易而內實剛毅

居官_李孳愛民廉介之操乃其素志不以始終有變故其卒也_無以爲殮哀積衆賻僅能舉其喪歸卒於成化辛卯享年六十有一

張頤

張頤字養正其先由江都占籍太原衛天順四年進士改翰林院庶吉士授檢討陞修撰擢都察院右僉都御史巡撫宣府後以軍功轉左尋陞工部右侍郎成化癸卯致仕弘治十三年卒賜祭葬如例頤有才氣而急功名平居持論侃侃恒出人右而才足以副之中外歎歷多有可觀者

雷澤

雷澤忻州定襄縣人天順甲申進士授刑科給事中
成化十一年陞刑科都給事中時僧錄司有盜賣度
牒者尚書董方欲緩其事刑部主事鄧存德奏方黨
比上以存德違例謫存德釋盜賣者澤上言當罪
方而宥存德不從又妖人李子龍以事伏誅餘黨土
原等獲宥澤言刑罰太縱乞追究悉誅之上不聽
澤寬嚴有執皆如此十六年陞南京太僕寺少卿十
九年丁憂二十二年再任弘治三年陞南京光祿寺
卿遂卒於官

周經

周經字伯常陽曲縣人父瑄爲南京刑部尚書謚莊懿經少有大志欲以經濟自見日侍莊懿公習聞天下事而氣勃勃不可抑及補父廕入太學益銳志學造詣日深天順庚辰成進士改翰林院庶吉士文名歛起與劉公健張公元禎俱爲大學士李文達彭文憲所重而端諒正直經又隱隱於縉紳間壬午授檢討成化三年陞編修十二年陞侍讀十四年進左春坊左中允仍兼修撰侍皇太子講文華大訓皇太子每起立拱聽內閣大臣萬安等或以爲勞謂經

宜跪請坐聽經不從竟得如禮在詞林幾三十年史局編摩貢闈考校皆舉其職至於啟沃青宮尤多規正及孝宗蒞極同事者俱進崇秩經以持正止陞太常寺少卿兼侍讀識者已高其骨鯁而未盡知其政事弘治己酉擢禮部右侍郎每議政歷事傳以經義若却西域貢獅毀黃村尼寺爲先朝盛德事皆經與左侍郎倪文毅贊成者四年改吏部尋轉左一日有中官諭旨欲以通政司經歷高祿爲叅議經獨執不可過與王端毅上疏論之靈壽獻大明川民田於太監李廣戶部駁弗得允經會諸司具奏事遂寢乙

卯諸司以災異言事吏部請早視朝勤聽政節侈費
省遊幸止貢獻而斥樂戲一事尤激亦出經手後有
踪跡爲此草者以問尚書耿公裕經曰宜以實對耿
曰吾爲尚書不宜他諉時論蓋兩賢之九年丙辰拜
戶部尚書諸王府多奏欲自領河泊所賜稅罷其官
上言國體非便且民力不能堪乃止有中官織幣南
京奏給長蘆鹽八千引鬻於兩淮仍給淮鹽價銀二
萬兩經言課策本以濟邊且各有分地今不嚴禁若
公許越境則私販必多官鹽反滯命止長蘆鹽勿給
浙江守臣亦請給竹木銀鈔稅爲織費又言關征非

舊浙地大水民困征役乞暫停織造 上從之每委

官監稅必諭以愛節民力如果入多者則與下考大同缺馬尚書馬端肅公請給糧銀市之且解督糧官毋得阻格既得旨經言糧馬各有職不宜侵奪且引祖訓六部不許相壓之文爲據辭甚激 上爲改命

兵部以馬價銀克用會邊方調度日繁給事中曾昂以財匱乏請令諸藩公帑積貯及均徭羨銀盡輸太倉經言用不足者蓋以織造齋醮土木之故若一切節省自宜少裕必欲盡括天下之財恐非藏富於民之意又有旨取太倉銀三萬兩爲張燈具經言不可

以小民脂膏供耳目之玩內靈臺奏增灑掃卒當給
月廩經言禁地非外人所得入不過爲守者私役耳
疏再上竟寢之清寧宮災方議修建兵部欲調山東
民夫七千餘人經曰今歲歉民貧不可使遠去鄉井
請以本羨銀就京師催役爲之識者服其遠慮而潛
消默奪非人所及云外戚張氏有河間賜地數百頃
欲并其旁近民田千餘頃得之且每畝加稅銀二分
經言河間地多沮洳比因久旱貧民卽退灘地耕之
過潦輒沒卽欲加稅將貽無窮之害且王府賜田例
畝稅三分而此獨加稅五分人將謂朝廷待外戚與

宗親異矣三四上後有以雄縣退難地獻爲東官
莊者上因經前奏皆抵之罪一時近戚貴幸有所
陳請一裁以法皆斂緝不得肆十三年庚申五月以
星變乞休上特進太子太保允之賜勅褒諭命下
廷臣相顧失色爭上疏留之是後中外奏薦至八十
餘疏前此未之有也十八年起南京戶部尚書未任
正德三年太宰許進素重之嘆曰使周伯常不用吾
死不瞑目矣推起禮部尚書會逆瑾司柄因乞致仕
不任後卒於家贈太保謚文端識者稱爲國朝戶部
尚書第一云

梁璟

梁璟字廷美，崞縣人。父諱資，有行義，鄉人稱爲直軒。先生璟性至孝，少時直軒偶血出於面，以舌舐之而止。正統己巳，北虜肆亂，直軒從征，官兵潰，璟聞變，披髮跣號，求父所在，值歸。乃己景泰庚午，舉于鄉。甲申，登進士，授兵科給事中。成化初，累遷都給事中，論事持大體。壬辰，與諸同官劾大臣不職者，因薦致仕尚書王竑、都御史高明，可用言太激，獲譴，幾殆，不爲變。癸巳，擢陝西布政司左叅政，偏歷所部，詢民疾苦，察郡縣吏稱不稱，得牧民體，分守洮岷，適西番縱掠，居

民驚徙璟提兵斬其魁民得復業者千計以內艱去
辛丑服闋復任巡撫都御史以下交薦於朝乙巳進
右布政使丁未遷左布政使敷惠勤事視昔尤普前
後十五年民盡被其澤矣擢都察院右副都御史巡
撫湖廣兼贊軍務肅風紀賑饑民理冤獄簡民壯以
增武備永州寇作督官兵平之鎮守中官毆殺王親
下璟勘覆力拒請囑不爲撓以外艱去壬子改四川
有武官驚不聽令者繩以法始帖服有劇盜亦督兵
勦之甲寅擢南京吏部右侍郎獨理部事鉅纖畢舉
戊午進戶部尚書出納明審時已嬰疾庚申得請去

歸居里中足不至公府篤倫收族事兄琮尤謹每宴會拜跪如少時所賜稟餼月必分給間以散諸族黨歲歉則出粟以周貧乏死者具棺斂葬之又建石橋書院以教子姓及鄉之俊秀給薪米筆劄而時課之暇則徜徉山水間以圍碁賦詩爲樂續且屬屬其子曰無廢義學蓋其生平所注意者故尤勤勤云以弘治壬戌壽七十三璟敦雅重厚不事矯飾隨所受任必舉其職閱歷既久資望兼隆而又先幾勇退以令終可謂不失其正矣

張縉

張縉字朝用其先順天寶坻縣人曾祖諱仲和勝國時爲太原路總管因家陽曲縉幼穎悟不凡旣冠領天順壬午鄉薦以成化己丑登甲科初知鈞州鈞民多頑獷以嚴治之皆斂手奉令尋以內艱歸終喪改知滄州居南北之衝且頻病雨潦多方賑救民賴之安權貴欲請境內地爲莊田縉不可其事乃寢陞南京工部郎中剷除宿弊羣匠故囊橐爲奸利者無所容未三年陞杭州知府縉以廉正自持守臣臺使以及監司無弗敬信者在杭八年節縮百費省民財十有餘萬陞山東叅政弘治癸丑河決張秋 上命平

江伯陳銳都御史劉大夏治之百需悉委調度甲寅
功成遂陞通政司右通政當行河衝決之餘溝防不
治縉相其緩急以漸修濬無所遺又於決口之東甃
石岸數里以圖勿壞又新築南旺東堤樹柳其上每
歲夏秋水溢挽卒得分行無阻至今便之庚申八月
陞右僉都御史巡撫寶定等府飭士馬以防寇掠有
發輒得寇幾絕嘗疏陳八事皆切民病辛酉四月陞
右副都御史巡撫宣府虜入遮繫屢有斬獲之功是
歲十一月改督漕運造舟之價必預給漕卒必選其
精壯者補之癸亥甲子淮揚連歲告饑奏留糧米萬

石所全活甚衆丙寅陞戶部左侍郎時逆瑾專政其不已附會南京戶部尚書缺以縉往卽因事建之時同建皆復官惟縉致仕過滄滄人留止之乃家於滄然瑾銜縉未釋也復與尚書韓文同下詔獄罰輸邊米五百石又坐前揚州災嘗改揚之兌運二萬五千石於鳳陽上納瑾以爲更制除其名辛未劉齊二賊掠畿甸滄被圍七日城中士民欲許賊和以緩禍乃謀于縉縉曰許和是降城矣於法何如吾家三十口誓不能降賊以生衆義之相與嬰城固守勇百倍於初賊勢挫遂解未幾復召爲右都御史仍督漕運

兼淮南勦賊事至則選鋒追勦又設伏以遏其衝賊圍邳繆素知東海千戶張瀛者以謀勇稱遂令率德士開南柵迎敵有三騎突來蓋賊魁也皆中矢以斃其黨遁去城乃完七月賊捨騎入江繆於儀真瓜州皆嚴兵以待既而賊勢日蹙乃有狼山之捷上勞以璽書金帛時境內累經兵燹民物凋瘵繆加意撫援漸有生意因老而倦於勤凡七疏乞休得允以南京戶部尚書致仕命有司給歲夫月廩居滄一年而終年八十有三繆器宇魁岸風神秀朗持已蒞下嚴重有威理禁處劇綽有餘裕故起州郡歷方岳陟臺

省所至輒著能聲樹成績居家孝友嗜學手不釋卷
星曆醫卜皆臻其妙性好吟咏有玉雪遺稿若干卷
又有奏議若干卷藏於家

陳璧

陳璧字瑞卿太原左衛人成化壬辰進士授嘉興知
縣改武邑擢監察御史巡畿郡山東剛直有威弘治
間陞山東按察司副使整飭臨清兵備權貴過者皆
斂戢陞按察使進南京太僕卿正德初陞都察院右
副都御史整飭薊州等處邊備兼巡撫順天等府以
病致仕尋卒詔給祭葬璧性慤直居官無所屈撓然

剛而少容人以是惜之

喬宇

喬宇字希大號白巖樂平縣人十七歲以金吾衛籍
中順天府鄉試錄其文以式中成化甲辰進士授禮
部儀制司主事是歲皇太子婚禮成及五王冠
受文綺白金之賜明年會試天下士署提調官綜理
有法撤棘之日簾內什用之器悉還之民丁未母卒
歸塋樂平杜門謝客讀禮考究所養益深祖塋有松
數百樹皆先人手自封植夏有蟲食之幾盡乃自爲
文以祭遂止弘治庚戌服闋除吏部文選司主事壬

子署考功司員外丁巳補郎中辛酉調文選司郎中
日益勤勵門無私謁凡三與考察輿論稱允至於拔
進賢才杜塞僥倖屏退儉壬無不贊行之遷太常少
卿武宗卽位命分祭中鎮霍山黃河西海及諸王
陵園事竣咨諏民隱爲六事上之多見采納戊辰轉
光祿卿專裁節浮費以甦民困陞戶部右侍郎庚午
遷左侍郎春至六月不雨漕河涸奉命禱祭海嶽
遂雨時宦瑾用事公卿多通關節宇恬然自守後瑾
敗獨皦然不爲所汙辛未轉南京禮部尚書乙亥改
南京兵部尚書叅贊機務治尚簡靜說者謂得畢公

保釐之道時番國烏思藏傳有童子能記前生事以爲活佛 上遣使迎之上疏極論甚傷國體且云國朝 祖宗相承所以不絕番僧朝貢者不過羈縻遠夷而已 陛下天縱聖明無微不至燭抑豈不知異端無益中國之治乎南京御史林有年以言事被逮宇論救得釋 上巡遊無時宣大之地往來數矣又復事於關陝以伐虜爲名乃上言天命人心累數百言無不剴切是時前星未耀中外危疑疏乞早建 皇儲以安宗社俱不報已卯寧濠之變濠與畱守太監劉珣交通欲取南都宇視機務密得濠反狀又知指

揮楊銳有才略可用廼署爲安慶守備誠之曰安慶
南京上遊密邇江西賊計汝必先知知則速來告賊
至必先攻安慶攻則汝當死守未幾賊變銳果能成
其功十二月 上南狩至則叛逆以平遂受朝正於
行在初有旨命百官以戎服朝見宇獨以爲兩京禮
儀一體豈容有異遂朝服率諸臣見時幸臣江彬怙
寵勢焰傾人統邊軍數萬扈從屯處京城懷不軌心
一日晚彬遣兵官索各城門鎖鑰城中驚駭不知所
出督府遣人來謀于宇荅曰守備者所以謹非常城
門鎖鑰孰敢索亦孰敢與雖 天子詔柰何督府以

字言拒之竟寢城中帖然彬每假傳旨有所求爲日
數十通宇每得旨必請面奏彬計遂不行鎮安都城
隱然虎豹在山之勢及駐蹕旣久倡九卿臺諫凡上
三章勸回鑿輿以安社稷爲重九月 上還京師扈
從至揚州歸辛巳五月考績錄前功加柱國少保兼
太子太保七月詔拜吏部尚書辭論官材總統百度
社請託錄遺逸至於進退君子小人之際尤所加意
中外翕然稱之 世宗入承大統新政之初銳意圖
治甚爲倚重宇亦忠勤靡倦知無不言言無不盡與
刑書林俊戶部孫交兵書彭澤協心輔政癸未王會

之期裁革冗濫至二千員餘前此未有也甲申以議
與國大禮不合抗疏乞休歸樂平始買地建宅徜徉
於山林中至朝廷之事從未言及戊子詔前議禮之
罪得冠帶閑住辛卯少師邃菴楊公卒宇出門下乃
渡江弔之及過江日南京父老識者舉手加額曰活
我公也多遺之以禮不受九月歸偶感痰疾於十月
二十六日卒年六十八宇少從學楊公於京師時楊
公爲中書舍人談經之學甚盛天下名士多從之遊
而成就者衆宇遂爲高第旣而舉進士又從文正西
涯李公游德行道義漸磨者深焉至今北方之士言

文苑者必首稱之爲文不以蹈襲爲工出入六經深
沉醲郁自成一家有克蒙稿若干卷其爲詩始擬古
後擺落陳辭往往多自得語渾然一代大家性嗜林
壑嘗歷雲中上恒霍登嵩華海岱搜奇探隱人莫知
之咸以爲有二李風晚精鑒賞名書古帖一見知之
家居所用皆陶器衣服似寒士而延接儒雅如恐不
及見善常如已出見不善惡形於色卒之日識與不
識莫不歎息泣下

王瓊

王瓊字德華太原縣人成化甲辰進士授工部屯田

司主事弘治四年陞本司員外郎六年進郎中九年
改戶部郎中有治才留心國計凡舊卷條例悉錄之
以備稽閱十二年陞山東右叅政十四年守制十六
年補河南左叅政十八年陞河南右布政正德元年
陞整理兩淮鹽法都察院右副都御史二年改總督
漕運未任陞戶部右侍郎三年改吏部本年調南京
吏部四年改南京戶部右侍郎丁憂六年起戶部右
侍郎兼左僉都御史賑恤畿甸山東地方七年陞戶
部左侍郎八年陞戶部尚書瓊在戶部嘗著論謂國
初制親王歲支祿米一萬石後因地方豐歉或有減

支郡王將軍俱有常祿亦因民供有限悉減支一半
本色一半折色其折色多不關支又如初封郡王歲
支二千石以後襲封俱支一千石後亦有例至今行
之夫以民供論之則日益不給以宗室論之往往衣
食不繼反不如庶民之家得自生計也又宗室犯罪
降爲庶民者計口月給米石比與將軍中尉反得實
惠宗室例不得種田納糧商販營利而常祿不給日
見其貧乏不能存活又國初定制百官俸給皆支本
色米石後改四品以上三分本色七折色五品以
下四分本色六折色今京官折俸四五年不得一

支外官通不得支俸祿之制如此欲禁貪婪是以難也故於邦儲斂散酌盈濟縮不尚同亦不求異凡非分干請有違成憲者執奏不易苟可以厚宗室利官民者亦調停行之人服其有心計十年改兵部十一年加太子太保十二年三月加少保兼太子太保不二年二進三孤初南贛撫鎮不得人兇民羣聚爲盜焚劫州縣無忌遠近效尤凡在虔楚閩廣接壤無非賊巢瓊薦王守仁巡撫其地及守仁請便宜行事衆笑爲迂屢不報瓊慨然曰朝廷此等大柄不與此等人用又與誰用我必與之竟覆議報可諸賊由是悉

平十四年正月守仁乞致仕當路素忌之欲從其請
瓊力言不可從留之會福州三衛軍人進貴葉元保
等作亂瓊知江西寧藩必反召主事應典曰此小事
不足煩守仁但假此便宜 勅書在彼手中以待他
變爾爲我做一題稿來看既成具題 勅守仁查處
福州叛軍及給事中徐之鸞等疏宸濠不法事內閣
楊廷和令兵部發兵觀變瓊曰此不可洩近給事中
孫懋建議選兵爲江西備留中日从第如議行之廷
和默然已而宸濠反南都告急瓊會衆於左順門獨
日豎子素行不義今倉卒造亂不足爲慮有王守仁

在彼必成擒矣頃刻覆十三疏詔削濠屬籍正賊名
次請命將出師趨南京勅北方壽祥防江都御史俞
諫率淮兵翊南京戶部尚書王鴻儒主給餉王守仁
率南贛兵由臨吉都御史秦金率湖廣兵由荆瑞會
南昌李克嗣鎮江西許廷光鎮浙江叢蘭鎮儀真慎
防瓜州壩傳檄諸路但有忠臣義士能倡義旅擒反
賊者封侯且令南京守備操江諸武職并五府掌印
僉事卽自陳取上裁務在得人以固根本詔悉從之
濠果不旋踵就擒十五年十月改吏部尚書加少師
十六年 世廟登極五月以人言謫戍嘉靖五年起

兵部尚書兼都察院右都御史總制陝西三邊軍務
時吐番侵擾甘肅瓊督兵擊敗之八年套虜入寇統
兵三萬出花馬池禦之斬首六十餘級捷聞 勅賜
獎勵尋以功加太子太保九年洮岷番夷寇鞏昌命
將擊討之斬首三百五十餘級撫定七千餘族降
勅嘉賞又置下馬關門接修邊牆一百八十餘里起
憇水堡至蘭州因地形勢挑濠塹八百餘里據險以
守邊人至今便之十年詔還改吏部尚書卒贈太保
謚恭襄

劉 釋

劉繹字以成號斗山代州人成化丁未進士初授戶部主事歷郎中總理遼東糧儲兼屯田逆瑾初擅權正急于貪或告瑾曰文官富惟邊郎耳瑾令人諭以指繹屹不爲動瑾怒械至京師荷校于吏部公署前時枷重法嚴晝夜監守雖親故莫敢近他枷者十日餘卽死獨繹至月餘得不死時同郡王某者以死侍側日夕不離繹曰我死其職也如君何王終不去方枷時有黃冠者至其邸遺家人藥一丸曰日剝一分服之盡則難脫是日繹昏習中夢仙人自雲霄下一以丸納之口中覺而口尚覺藥香監守者俱言見老

人送藥忽不見於是喧聞九市上達朝著西麓張太宰乘此異言之瑾得釋爲民後瑾拜選授監察御史朝野咸稱爲鐵漢公云

唐希介

唐希介字景賢陽曲人成化丁未進士改翰林庶吉士三年授工科給事中隨事建明直聲大振久之特被簡命稽省真定等四鎮儲備躬親閱實盡得宿弊以聞於是權倖見嫉以他事中之謫四川石柱宣撫司經歷萬里遠竄怡然就道旣蒞任承檄署仁壽雙流三邑植善鋤惡俗用丕變又檄視州茶政廉發私

隱黥吏褫魄稍遷漢陰縣令有鉅豪作姦持吏短長
所居窟穴湍阻捕吏莫敢蹤跡密設方略擒而斃之
繕完城郭百廢具興再遷知揚之通州州臨海有漁
蒲鹽泊之利盜劫出沒司徼巡者歲入其賄陽捕陰
縱民賈交病至則揭賞購示以威信盜望風散逸境
內又安河堤潰決撫巡檄以董治乃內籌規畫外別
勤情旬月之間績成庚申擢陝西僉事督餉榆林邊
吏有乾沒稽緩者糾慝繩違軍餉不乏邊氓有爭田
久訟者兩室其侵怨仇立解時大學士石淙楊公總
制邊務議增置茶市以贍軍賦因條答便宜二十三

軍石滌公并施行之未幾改四川僉事尋擢陝西副使榆林兵備仍兼督餉愛養士卒約束裨校戎乘肅睦邊威赫然軍府多贏積中官欲私取力執不可謹籍以俟調發中官銜之搆于逆瑾瑾矯制逮繫三木長安市長子淇擊登聞鼓訴寃罰輸居庸米三百石復其官瑾猶覬往謝迨終不往乃嗾御史劾以不勝邊防重寄有詔着致仕歸

楊傑

楊傑字廷俊平定州人成化十四年進士改翰林院庶吉士授編修九年秩滿陞侍講充經筵講官弘治

四年纂修 惠廟實錄成陞司經局洗馬九年充
東宮講讀修大明會典未幾卒賜諭祭傑未第時祖
業悉以讓兄自負甚重人亦以遠到期之而竟止於
是故其卒也人情多惜之

劉淮

劉淮字濟之號西溪代州之崞縣人年九歲而孤家
且壁立母楊脫簪珥爲膏火費命師邑人程少尹楊
嘗撫之曰劉氏一脈若髮引千鈞幸少樹立不替韜
略之傳卽吾含笑入地矣言旣衣盡沾淮亦跪泣不
能仰視乃益自刻勵嘗曰大文不章大武不劔遂以

道馭兵以文經武成化庚子襲蔭張中丞一見奇之
遣入學官由是學益邃博弘治壬子始弱冠卽出守
保安新城心綜理覈武備大修甲子轉守懷來城時
中丞馬公中錫以懷來爲路衝賓需咸索之下曰無
爲免我清白守也遂以官銀三百兩給淮供需不甚
鉤稽自無所染乙丑攝本鎮西路分守一時恩威並
著雍中丞泰性嚴毅少許可每器重之逢人卽曰我
劉某云正德丙寅總制中憲劉公詡薦陞南路叅將
丁卯陞宣府副總兵 上賜飛魚一襲時龍門所虜
酋花當久肆侵犯奮兵勦之捷報 上嘉悅進級賜

金幣庚午註中府都督僉事御勅佩鎮朔將軍印鎮
宣府以統馭得宜地方寧謐賜勅獎諭及蟒衣金幣
乙亥取回京管耀武營賜斗牛紗羅衣各一襲環絛
有差尋管團營東官廳左叅將時 武皇帝幸邊邊
將輩競起取寵淮獨裁抑退讓 上亦整容待之謂
爲劉夫子云庚辰歲 武皇帝升遐向競進將輩咸
置之理太皇后與顧命大臣以淮不附權幸命視西
直阜城門慰以溫旨辛巳 世宗踐阼命鎮守關陝
註右府都督僉事克總兵官賜制勅符驗金幣鎮陝
一年虜無侵暴人有寧宇常祿之外諸凡悉裁之壬

年疏懇歸總制李公鉞以金幣三百餽贐辭謝之一
無所受後復起取管揚威營提督巡捕京城庚寅歲
又註左軍都督僉事勅鎮守遼東賜制勅金幣在遼
六年招徠夷落振作軍威地方爲之一清建州被虜
者流移高麗王給衣食驛歸淮嘉之以文 上勅厚
賚國王王感之曰非劉太師 上何以至此其化被
遠人如是明年以引年致仕 上溫旨留之遼之撫
巡及文武致政士大夫在京國子生進貢夷人悉具
通狀留之以故不獲歸未幾有軍變窘辱撫臺淮至
處分乃止遼人非淮中處禍變將不止雲中矣後淮

惟自劾自訟人有稱其功者曰兵士若是撫臣若是而謂某之功也其謙抑引咎類如此歸里尚康健優游林下者十餘年卒

陳璘

陳璘字邦瑞號一石陽曲人弘治己酉鄉試第二癸丑賜進士授太常博士戊午拜監察御史巡居庸諸關躬歷險阨疏守者立將官增戍兵巡按山東會蔡河淤塞河流逆沒民田匯爲巨浸而稅尚在民璘奏罷之遷浙江僉事轉陝西苑馬少卿時少師楊公一清總制三邊疏遷薦左叅政督軍餉尋晉河南

按察使時豪猾交納宗室侵軼法制人咸苦之璘捕獲悉正其罪境內肅然陞左右布政使拜都御史巡撫延綏至則繕城堡利器械足倉廩募戍兵選將校邊望大震丙子虜入寇斬獲甚多有璘衣金幣之賜總兵柳勇叅將李永定交納中貴緣爲奸利劾罷之巨璫江彬勢焰張甚帥臣戴欽附之其子以殺人抵獄彬欲活之不聽邊人相語爲真都御史云數引疾乞歸不允未幾相繼丁內外艱始得解任以歸至嘉靖十七年卒壽七十有二

王源

王源五臺人弘治間進士由主事歷陞四川僉事以政績著正德間流賊作亂提兵捍禦力戰而死詔褒其忠贈按察使

崔 仇

崔仇陽曲人弘治初進士歷官保寧知府操守廉明政蹟大著府有疑獄積未決者悉得其情而釋其冤時流賊擁衆欲肆劫掠聞其忤逆瑾得請歸田卽引衆避道一方賴免後祀于蜀名宦祠林居三十餘年蓋粥自甘杜門不出鄉人多有不識面者所著芥菴

集藏于家

張天相

張天相太原左衛人弘治間進士授戶部主事累官至陝西左布政使積奸宿弊剗剔殆盡獄有疑而久不決者一訊立辨人皆稱其神明

寇儉

寇儉檢次人年二十始折節向學博綜羣籍自經史及百氏探幽發微根極領要而後已雖天寒閱卷坐竟日夜半猶隱隱聞讀書聲早作無憊色弘治間舉進士授大理評事陟寺副駁覈多所平反未幾值內艱以憂勞成疾卒儉氣宇沉默局量凝遠制行一以

聖賢爲法人與之接邪僻自爲之消比卒士林感
之

白侃

白侃平定州人進士拜監察御史按視南畿條陳六
事 上深用采納時給諫王徽抗疏劾牛玉及李賢
忤旨禍且不測侃率同列連章申救公議重之又巡
光祿太倉居庸等處所至有水蘖聲官至副憲卒

胡孝思

胡孝思字纘宗文水縣人進士爲蘇郡守務在與民
休息養以寬和博大之治公暇則遊行湖山因亭題

墨淋漓遍於崖石累官御史中丞撫河南 肅皇帝
幸楚咏詩一律紀事刻之石後致政家居者數載矣
邑令王聯曾以貪見扑啣之時爲戶曹郎乃指詩中
穆天子湘竹句爲怨望呪咀及素有郤者咸指爲孝
思奸黨奏之 上震怒悉下獄論死時孝思年八十
矣了無怖畏詠歌不輟衆爭掣其筆曰君正以詩坐
累尚伊唔何爲孝思掀髯笑曰坐詩當死今不作詩
得免死耶久之 上怒稍解許廷杖三十放歸時有
贈以詩者方病瘡甚呻吟不絕猶口占答之

吳嘉會

吳嘉會字惟禮號南野代州人嘉靖甲午舉鄉試第一明年遂成進士授行人轉比部郎有盜夜殺人壩上斂其貲賊曹拷掠旁近人具獄心察其枉特令頌繫而陰使人跡盜盜得賊曹坐褫官從此有聲郎署間矣辛丑擢山東僉憲歲稔設法賑之明年虜深入太原計以臨清海岱間都會議城其外郭簡練材武士以待虜止不來甲辰小清河決築長堤扞之民免墊溺詔賜金綺轉本省參政青州豪民糾衆數十百人牟礦利直指欲擒以爲功嘉會曰此屬片檄可解急之恐鋌鹿走險耳不聽豪果與顏神大盜合執吏

逆顏行而始悔不用其言單縣妖人楊惠等聚徒數千僭署將校流劫四省官兵攻之不下嘉會單車詣壘宣言曰棄仗走者爲良民不且孥戮衆烏獸散獨兇渠數十人未服縛而磔諸市東土以寧肖像祀焉丁未陞憲副改備天津庚戌虜闖入薊塞直薄都城薊守臣被逮卽日超拜嘉會右僉都御史整飭薊鎮邊務至卽條上更始善後十二事日夜屯戰守具起居庸盡山海關初修石垣四萬丈甃敵臺封堠二千六百座有奇卽其地分爲十區區設叅遊兩將軍分統健卒合之凡八萬人人予怒馬堅甲長戟利鐵軍

容煥然一新於是虜犯河防堤師擊走之虜二十萬
騎入潮河川設大營待之二酋並馳而前應弦倒乘
其亂擊之斬殺無算虜宵遁虜萬騎從馬蘭峪入寇
約大帥逆戰於郝家莊斬首虜獲器畜大捷而還虜
再犯古北口伏兵陜中而設火器于山巔虜夜至伏
起砲發自相蹂踐而去虜寇昌鎮發健卒據大石巔
虜至我軍下礮石連斃數酋計窘却走鎮薊七年虜
匹馬不得入塞事聞先後賜金綺者五廕子錦衣千
戶者一國子生者二晉貳本兵闕六師校諸將材武
再賜羊酒且大柄用而爲相嵩所忌中讒罷歸歸三

十年卒壽七十有七 神宗登極追念邊勞遣官臨祭營兆域

孫璽

孫璽字廷信代州人明春秋深慕荀息之爲人少舉於鄉初令諸城改令扶風有治績正德六年蜀盜寇漢中略陽漢中要道也都御史集省臺議略陽知縣嚴順懦扶風知縣毅而多知可以集事遂檄璽往城略陽順耻之百計撓其所爲璽周行相地布令于民期一月而城成未屆期蜀盜卒至城已成三面東門尚未竟功順曰城必不可守曷亡城中人亦譁欲亡

璽抽佩刀斫坐几曰敢言亡者視此几盡出城中已
矢令賈輿隸卒持之登城礮石積城上如阜以水沃
瓊披之障矢命令若丞簿尉各守其一門而東城之
未完者璽自守晝傳食夜張火鳴柝警鉦周視無懈
賊攻三日弗克已欲移去會執告急者發牒知城中
窘甚復悉衆環攻之已而順奔城陷賊執璽殺之大
掠三日而去順渡江還牘報曰與扶風知縣偕奔而
璽溺于水取江濱一尸棺之還其鄉其子暨族人故
視之非璽也乃走京師投匭以辨事下御史王廷相
治乃得實奏上制贈光祿少卿賜祭廕一子入太學

張 鍵

張鍵字君重石州人正德丁卯薦於鄉明年舉進士授南京戶部主事忤逆瑾建至京師以義命自處竟不爲屈調衛輝府通判典境內稅事務爲綏輯歲額登而民不擾值河水漲溢壞民居承委治之疏壅峻坊曲盡其法水患以息瑾拜復戶部主事督儲天津值流賊奄至勢甚猖獗兵備副使陳公天祥提兵禦之鍵爲居守登城誓衆晝夜不息卒保無虞薊州莊田累經奏瀆有司弗能決銜命往勘躬履疆畝一一爲精覈歸其侵於民權勢斂迹人皆避之河套虜入

寇關西大振長沙彭公澤涿鹿鄧公璋相繼總

事諸鎮皆空廩請餉之使相屬于路召商易糴兼搜積逋不遺餘力轉輸千里士無饑色會蘭州大侵死者枕籍卽發粟賑之親啜以粥活者甚衆事竣東歸蘭民遮泣去則思之勒其事於石繼延綏報警復從統軍都御史陳公天祥給餉邊人聞之喜曰此前張石州也吾輩何憂名益籍甚尋擢開封府治隸郡縣四十餘文移旁午揮遣如流尤以撫字爲先事有不便於民必釐革之雖疆禦弗畏飾吏以儒崇學政養士風務底成效諸生有弗能自給者輒周以粟並恤

婚姻郡齋故有亭亭下有池辛巳秋忽有蓮盛開
人以爲瑞而乃不久逝矣卒于嘉靖壬午年四十有

六

張文明

張文明字應奎陽曲人正德辛未進士授行人拜監
察御史出按遼東斥奸植良人畏而悅之虜犯邊鎮
巡官皆畏縮力主進兵連戰大捷斬首百數十級虜
懼而遁丁丑按陝西發中官廖鑿貪橫捕其黨二十
四人寘于法明年武宗西幸上書切諫指斥權倖
謂江彬有可斬之罪十并謂諸司官有如泥塑紙糊

之語大忤朝貴謫電白縣典史 世宗馭極召錄言
官復御史原秩造朝甫旬日具疏請辨忠邪端治本
未及奏語泄爲時宰所嫉出知松江府都御史李公
鐸抗疏言文明忠黨當置之廟堂以作忠義之氣不
省文明北人不習南中水土又舟次蒸鬱涉江而疽
發於背至郡甫視事一日疾劇竟不起卒之日竟縶
冠帶東向端坐而逝須臾大風澍雨飛屋拔木江水
皆漲溢人莫不傷悼之按使者謂以忠直抱鬱而死
宜贈官廕嗣以彰其節詔贈光祿寺少卿

党承志

党承志字汝孝號牧川忻州人正德庚午舉於鄉明年連擢進士授直隸保定府推官蒞以明恕疑獄立釋怙終者不稍貸居三年故俗大革其治行稱天下第一乙亥徵拜刑部主事會吏部司屬缺員朝廷慎簡諸曹更補太宰陸公獨器承志奏調驗封主事乙卯武宗西幸具疏謂朝政紊數威柄下移宜親賢遠奸恭默圖治寥寥千餘言辭過激杖於闕下未幾陞稽勳司員外郎嘉靖改元預修武廟實錄是冬克晉藩冊封使卻餽遺癸未陞驗封郎中甲申議大禮抗疏忤旨復被杖繼調考功再調文選先是選法

壅於請託銳意裁抑凡銓除擬注各量才器權貴惡
其厲已深銜之丙戌擢通政司右通政提督武職錄
黃丁亥值災異詔求直言上疏條陳者四曰節財用
減徵需飭邊防練兵卒皆切中時弊權貴不悅遂陰
諷言官論列然無瑕可指止攻其峭執竟坐罷既歸
杜賓客絕交際與二三逸老遊眺川壑怡神自足彈
冠之念泊如也先後撫按薦起凡十數已亥詔用屈
滯吏部合臺諫疏其儒術弘深特宜甄錄不果或勸
結津要謝曰行藏有命君子貴守道不辱身枉尺直
尋吾不爲也庚子北虜內寇郡城早且壞亟白撫臺

檄令增築民樂輸其力工成恃以無恐又捐貲葺古文昌祠輪奐孔飭別構堂數楹羣諸子姪及鄉之俊秀課業於中挾策鼓箏洋洋而興焉天性夷曠篤於倫理事父樂軒公曲盡愛敬弟承賜進監察御史卒於官恤其孀字遺孤如已出處鄉人底裏洞見恂恂若無廟廊貴者居常博覽強記自經史百氏以至兵刑律曆象緯堪輿之說靡不該貫故其文涵肆演迤蔚然成一家言詩尤縝密淵粹得唐人體後學爭傳誦之晚著忻州志若干卷年七十有三髮澤面碎鬢鑠無情容俄頃疾作翌日遽卒

侯綸

侯綸太原人生有異質邃于易學正德間進士任戶部主事禮部郎中擢湖廣副使伸雪冤獄督大工費出有經民不知擾值歲饑上饑民圖民獲賑以蘇官至戶部侍郎子汝諒舉進士歷官都御史亦以廉能稱

陳臯謨

陳臯謨代州人少以學行稱正德庚午解元登辛巳進士知三河無錫二縣有惠政擢給事中劾席書謂
之至本自 聖心不當貪天功以爲已有又論

定於郭勛不宜挾公論以快私忿已丑同考會試
時稱得人

王 玫

王玫忻州人家貧有學行正德間鄉舉授許州訓導
講學淑人士心感服擢福山令清苦仁恕時多異政
民繪像立去思碑官至工部郎中以剛正忤權歸居
鄉多厚德高誼士林推重

喬 毅

喬毅樂平人進士選庶吉改給諫糾正官邪規切時
弊爲時推重歷官二侍始終一節其勲望最著云

寇天敘

寇天敘字子惇榆次人貌而孩卽不喜嬉戲五歲時
母趙淑人病久髮弗櫛家人欲剪之敘曰是不可毀
傷及卒哀毀如成人禮十二旁通舉子業稍長名燁
燁動三晉弘治辛酉舉于鄉卒業太學尚友天下士
而與馬伯循呂仲木崔子衷切劘聖賢之學以躬行
力踐爲本正德戊辰登進士第尋陞南大理評事每
錄囚務矜恤讞疑理枉多所平反有勢豪撲殺人出
家人代伏其辜敘評之曰天道神明獨誰欺乎乃駁
奏竟抵其人之罪不畏強禦尤憫憫然留都人人知

寇評事會兩京曹官得舉科道趨者恐後天敘曰官求盡職何必科道耶獨不赴布袍羸馬晏如也既考績部院皆著上考丙子陞寧波知府府巨室能訛是非成敗人敘曰吾惟知爲國恤民爲民恤財已矣是非在人成敗在天則何能知徭役稅糧宿弊叢積首釐革之利罔不興強每肉弱乃抑其強而弱是植丁丑百穀不粒糧額如故民患之乃白於部使者米得折銀省而易輸皆欣欣稱便且禁遏公役人無落鄉勾稽以重民之擾事惟期會而已俗囂於訟每一投牒卽盈庭聽斷無宿案而日以簡省有董孝子祠

以女人像非禮也亟踏之祀先師教演大成樂庶幾
洋洋之音尤專意學校每進諸生訓以德義器識之
大者而論文務崇理致士經品題者多取科第顯顯
嚮風已卯陞應天府丞民惘惘然如失慈母迨至應
天會府尹缺卽攝府事時寧庶人反 武宗御六龍
討賊庚辰春駐蹕留都權嬖怙寵提督江彬尤鴟張
所過率以重賄免於禍守臣亦諷賂之對曰與其行
賄敗節寧得罪何傷彬洵洵每務持迫之屬有不可
行之事指畫利害與之抗論多所中止中官勾妓婦
善音者數百人拘之別室以備供應饑餓疾病累累

迫於死言於彬而釋之常以事觸彬怒令人偵之迄無短可持偵者乃勸往謝彬竟不往而彬亦不能有所加也其他權嬖所需直沮之曰俟面奏與卽與爾皆莫能誰何 駕北旋諸守臣送之維揚卽得還天敘迤邐於淮安坐不行賄爾是時江南諸郡皆緣迎駕厚斂民而乾沒其間 駕駐留都凡九月費且不貲一一出經畫而民不知亦不病也壬午嘉靖紀元應詔查舉內府神帛堂十庫及花園進鮮諸冗費謹敷奏之百餘年之弊一旦而革甲申饑饉人相食多方賑恤鄉落散米粟城中煮粥以舖之尋復大疫施

醫藥周視閭閻或勸止之嘆曰我爲百姓癘豈干耶
治應天四年餘百姓恃以爲命是年陞左僉都御史
巡撫宣府已復改撫治鄖陽未幾又改甘肅節鉞市
臨虜騎犯山丹指揮將士遏其鋒斬首首脫腕木兒
及部落三十六級威名遂震甘肅荒徼諸司往往眇
之凌蕩法守敘訓人以廉德樹素絲之風而先之太
監總兵官役軍雜草輸之官廨所給值價一到則盡
奪而有之乃榜令軍交草於官官交值於軍毋旁落
他人之手屯糧額外有科並嚴其禁又每團軍士較
其技勇懸銀的而令射之諸所俘獲賞必及其功買

功賣功悉論罪殞於鋒鏑者尤加之意什伍之衆桓
桓有鬪志先是回夷土魯番侵軼酒泉郡廷論閉關
絕貢且二年餘彼譯文求和辭涉悖慢天敘議曰彼
夷勢必求通於我而我無終絕之理能絕其貢路矣
將亦絕其入寇之路乎但彼夷桀驁不大挫劔之則
朝和夕叛無益是宜聚糧犒師以張我撻伐之威以
堅彼夷悔禍之志然後議和則操縱在我而不在彼
庶可恃以無虞又總制軍門欲遣使傳檄詰責土番
送出哈密或聽選擇一人主理國事獨執不可以爲
祖宗間關立哈密而欲世世守之雖被占據終我

也若廢置曲之則地彼有之矣豈春秋正侵疆之意乎况倉卒遣使而爲彼羈留如國體何乃削去聽爾選擇立王數語直付進貢回使執之去此皆長久之計也又講御經筵親羣儒講求治道又以嚴清戎謹備禦廣屯種添京運處物料添軍器分部官七事爲備邊要務皆隨行之丁亥陞右副都御史巡撫陝西關中兵荒地貧民艱孔亟專務安靜養民輕徭薄賦節縮費用以紓其力吏習日佻申飭官箴以警之而貪暴之吏必斥芟貸且訓練軍士作其敵愾虜薄固原鼓而擊之斬首一百有奇捷聞 璽書褒異陞俸

一級兼有文綺白銀之賚戊子春會織造太監至行部之臣議奏罷之敘曰意則美矣但初到遽奏恐卽不罷將益張其焰爾事各有機姑待之可也是歲大程陳乞廣捐糧額大發帑銀兼支引鹽皆得請喜曰吾民生矣乃夙夜皇皇周咨長慮講求善法手提其綱簡庶僚而分任之凡所以祇承德意而康濟斯民者無遺力故民雖嗷嗷而卒之溝無瘠道無殍又疏織造太監非荒年所宜設非饑民所能供果得報能其精於慮事類如此庚寅陞刑部侍郎遭外艱歸大臣臺諫各騰章薦其可大任癸巳服闋改兵部侍

郎天下想聞風采以疾在告雲中變作力疾上疏極
言叛軍稔惡怙終宜彰天討乃陳分別善惡與懸賞
格諸方略憂時之心雖病不忘已而疾殆竟卒年五
十有四性孝友敬在大學時碎聞父毅菴公有疾裹
糧而馳歷六晝夜跋涉千餘里而抵家躬視湯藥疾
遂瘳自是無離左右迎養於四明於留都於關中痛
淑人蚤卒每言輒嗚咽忌日痛哭如初喪中丞張南
川稱其寬而不縱嚴而不迫大不遺遠細不遺近涇
野呂宗伯稱其行已省身可與神明質可以知其槩
矣

孫紹先

孫紹先字汝宗代州人父璋舉鄉試第二汝宗始能言輒取書筆爲戲五歲能屬對七歲能文十三文思迅發書過目不忘提學副使王鴻儒閱其文大奇之鄉試舉第一連舉進士改翰林院庶吉士授檢討充經筵官歸代州卒年三十四紹先長身方面目視不能及遠天資警敏方直寡比非其志雖大貴人不能屈發言必信已志不以一毫徇人明于世務遇事方作暨作事者意所嚮輒逆之曰某何某何已而果然狹中少容有不平厲于言色不惜其人之能堪也

嘗曰應物能化聖人之厚也。鳩中飴外，儉人之忍也。吾上不敢望聖人，而下耻儉人之爲。吾雖以是獲大矣，然吾心無他焉。初治易，旁通四經大義，讀諸史及濂洛家言，暨入翰林，讀左氏國語，暨秦漢人書，每日六經未易及，必欲爲文，此其矩哉。故所作古健而辯，發意會旨，轉相承乘，紹先治經，不皆用傳所摘發，皆大義，不以一言一句爲異。曰：古者以行爲言，故其文簡而中；後人以言爲行，故其文煩而億。彼爲傳注之學者，自壯至老而見猶未定也。其皆聖人之意耶？汝宗所爲字辭序記碑表書贊，凡百餘篇，弟遠宗亦入。

翰林官檢討

張珩

張珩石州人正德辛巳進士授監察御史累陞大理寺少卿僉都御史巡撫延綏尋遷南京都察院右副都御史提督操江未幾召入協理院事進左副都御史會宣大總督罷廷議屬珩珩以鄉曲辭爲言者所指落職久之以原職起巡撫寧夏進兵部右侍郎兼右僉都御史總督陝西三邊前後獲首功甚衆上數賜璽書金幣勞之進右都御史居數歲拜戶部尚書督理太倉未至值虜寇延綏坐失事被逮謫戍慶

陽已復起爲副都御史巡撫延綏遷前職丁母憂歸卒于家年七十餘珩素履修潔器識弘遠尤博綜羣籍爲御史時會講官缺輔臣有謂珩才行可充侍從者欲推轂入翰林珩三疏力辭不就時論高之訃聞賜祭葬贈工部尚書謚襄敏

謝蘭

謝蘭字與德代州振武衛人正德己卯舉於鄉嘉靖丙戌登進士授真定府推官適 詔清三宮皇庶承委踏南宮寧晉二邑地瘠多水患主者欲益畝賦力爲民爭主者怒蘭毅然曰吾寧獲咎於上司不忍貽

小民千戶之害會臺諫直其議主者竟不能奪自是
直聲大起二邑民立祀尸祝焉旌取授御史出按遼
左肅邊紀覈功罪遼鎮以鐵面稱繼按浙省貞肅有
體簡禮於時宰乃外補山東臬司僉憲時運河塞承
部委疏濬底績奏聞加俸一級歷陝藩叅擢河南憲
長左轄所至以廉明稱遇督撫觀察咸數其德望勞
績屢騰薦剡嘉靖丙午推授右副都御史巡撫陝西
陝地外供三邊西備番虜兵民事繁疏上方略陳安
攘大計數事 上俱許可居常覈軍實括民隱禦虜
防邊嚴吏寬民省財恤將靡不究心率作陝士民訟

之歲丁才壽簡大饑民囁弄口麓僉是達四言者賤
恤率諸屬陳兵論盜咸解散捕其渠魁三五人置之
法民賴以全活者鉅萬奏聞 上嘉其功晉二品俸
賜金幣會督臣誤議復東勝蘭力言其不可謂必挑
禍殃民貽西顧憂時藩臬中一二少年迎督臣意以
抗之蘭卽大計直指其罪狀則斥去時朝議未定矢
以去就爭之未幾督臣得罪議遂寢人益重其忠諫
有執云疏謝病歸 詔不允已酉秋陞工部右侍郎
尋以考績 誥封蔭子庚戌轉貳兵部是歲秋虜犯
近圻 肅皇怒罪逮本兵左遷蘭南京太僕卿尋賜

以原職致仕歸山課子耕讀悠悠泉石忘其貴顯與
諸鄉先生爲社日以詩文自娛每聞國家有變故輒
戚然憂形於色得古大臣體 莊皇帝立詔晉階一
等七十有九而卒

唐寬

唐寬字栗夫號蒙山平定州人嘉靖乙酉領鄉薦明年春下第篤志問學不休壬辰登進士筮仕永平府
節推明慎用刑凡所推鞫無不得情者三載考績陞
刑部主事歷員外郎中奏勅恤刑陝西平反甚衆壬
寅陞懷慶知府會民疲甚寬薄稅省刑鋤強扶弱時

鄭府官校倚勢凌虐平民每執而杖之又有鄉官掘
城土造屋罪其家人禡其車牛百姓稱快因被毀於
憲司稔知廉節竟莫之信也且以造毀之人語之後
與毀者遇諸席絕口不言禮貌如初其人深自慙愧
爲政三年百姓富庶教化大行丁未陞肅州兵備副
使肅近玉關番漢相雜素稱難治寬爲政不剛不柔
撫綏有方夷方畏服不敢爲暴有獻遠物者卽卻絕
之由是遠人益畏邊圉寧謐時有無碍紙價千金例
官取入橐寬毫髮不取有勸之者艷然曰若教我爲
不義耶遂以贍公用戊申陞陝西行太僕寺卿丁繼

母憂服闋補甘肅行太僕寺卿癸丑入賀 聖節歸
未抵任丁父憂服闋補陝西苑馬寺卿戊午陞四川
右叅政尋陞四川按察使發奸摘伏剖決如流吏畏
民懷咸稱神明庚申陞山東右布政明年轉左先任
者率任庫吏刁索納戶寬知其弊親爲閱視納戶大
省浪費時撫院嚴治窩盜者逮及士夫一方騷動每
爲勸解中外德之壬戌入覲陞太僕寺卿未幾忽起
尊鱸之興語人曰吾精力漸衰慮糜廩祿恐負朝廷
盍退處山林以終餘年乎遂上疏乞歸 上不允辭
陞應天府尹不欲往因憶幼年曾夢至南京乃強爲

一行至見南京景物宛如夢中嘆曰吾夢旣應終於此矣遂於是年歸越二年卒

潘高

潘高字子抑號春谷寧鄉人自幼以才顯名年十九登進士第授大理評事當是時朝多賢士大夫文章政事各以所長相高而其篤志好古者則又相聚以講良知之學視文與政不屑爲而彼亦詆此以爲僞勢幾不相容高盡遊其間論雄詞辨莫可窮詰諸前輩相視以爲重於是名益聞然忌者亦抑衆每諸司有所建白其詞稍不襲故常輒譁曰春谷筆也出之

陝西踰年以前大理罷官其祿食僅九年年二十八
耳旣罷論者咸謂處之太過高亦痛自懲思盡屏去
華藻以就精實士大夫乃更賢之凡持節蒞晉者交
章以薦竟格於例不果用以嘉靖丁巳卒年四十有
四

周 鈇

周鈇榆次人父文德醇慤有賢行鈇嘉靖間進士任
監察御史杜奸弊出淹禁巨璫欽服出按陝西規畫
邊備允協時宜濬通馬後改官僚以陳言
邊事遠謫復起國子監丞遷吏部主事公黜陟絕請

託薦紳畏其節以抗疏出判河間竟落職家居不通
官府出間巷徒行如布衣